

Mukaana a Poole Kundaabasi Efedze OSOMO

Wu me mukaana wu ósono Poole kundaabangaa a kana ba bali ku Efedze. Lo nde ka ásono mukaana wu yini a mu nkooro a bo o, mu kuulu, mu mikaana milagha mi mikulu, ka básono kwumu yi a «Efedze» mu etsulu kii nsomo o. Odzyi osuo ti Poole ásono mukaana wu kundaabanga-a-kana baba mabvulu malagha mama ku etsulu e nsie kii Adzi, mpaala bo bamana otanja nde, bagwa nde kundaabanganda. Nde ásono mukaana wu mu matala ma áli nde mu boloko ku Rome.

Efedze líli bvulu li libvulu mupfunu ña kara li mabvulu mwohononama empu kii Rome ma máli ku Adzi. Baara balagha ña kara li baara ba bákakala oko báli minta-nkaala. Bo bátwu nzaami a bo wu a nkwumu Aretemise nzo yi a nkara bubwe. Basi-Rome baakata nde mu nkwumu yi a Dyane. Aretemise áli etyeghe mu efaana kii mukaha. Bo bákagye mu nzo yi a nkara mbwe oyo mu okayisamana kye. Baara bwohononama baba oko bákasa kana mu etyeghe ekye, maha ba-Dzwife ya bakriste. Mu matala ma obvughuru Poole ku Efedze mu midzye mi nde mimi myele, nde áluo ba-Dzwife baba oko mu etsughu kii Sabate. Ña mbihi, nde abvughuru mu kuulu nde ka ákughu ogyili oko o, lo nde ályele bo ti nde faana obvughuru. Mu matala ma abvughuru nde

mu midzwe mimi mitere, nde ási bamvulu batere mu okaluo baara matala mwohonono (Big 19–20).

Mandagha ma me ma ookasuo Poole munga mukaana wu: Nzaami aasuo bihi mandagha ma básweghe ma akuru nde mu bubwe bu nde. Mbaala ti, nde sa abvughu bilogho byehene bibi ku mayulu, ya bi bili na nsie mpaala Yiisu akala Mfumu. Nde ábwehe ti bakriste bafaana ogwihini ya okala ti anga bandughu mu kana. Ka bafaana oleye o ti wu mu-Dzwife, wunii ka li mu-Dzwife o. Mutaara a bo li yini a mumõ, me Satana. Mu obo, bo bafaana okasamana na emõ mpaala Satana anyaa okala a litumu na yulu a bo. Poole áfirilyele bunu a bo baghala afaana okala ya mukala a nde, bunu a bo baana bafaana ogwolo bataara ba bo, bunu a bo bankana bafaana okagwolo bamfumu ba bo. Nde ályele ti banga-a-kana bafaana okala bumõ ya Kriste.

Bu me bu baakakaba mukaana wu:

- 1) Mamboro (1.1-2)
- 2) Kriste seme bihi ya Mufulu a Ngili (1.3–3.21)
- 3) Litswe likala a bumweẽ bu bunyaghara emõ ya Kriste (4.1–6.20)
- 4) Mamboro mama masini (6.21-24).

Mamboro

¹ Me Poole, ntumu a Yiisu-Kriste mu waa li Nzaami, nsono mukaana wu kundaa baba ngili ba bali ku bvulu lili Efedze, ba baakasa kana mu Yiisu-Kriste:

² Nyaã bwehe ya edzuunu bi bifi kundaa Nzaami Taara a bihi ya kundaa Mfumu Yiisu-Kriste bikala ya be!

Liseme lili mukughu mu Kriste

³ Masyighi kundaa Nzaami, Taara a Mfumu a bihi Yiisu-Kriste, nde wu aaseme bihi mu Kriste mu liseme lwohono lili mufulu mu mayulu.

⁴ Mu nde, Nzaami ásuolo bihi nsomo nde agyighili nsie, mpaala bihi likala baba ngili, ba bagwene a epfwumu ña busu bu nde. Mu dzyi li nde, Nzaami

⁵ átswamagwolo munkana mu osa ti bihi likala baana ba nde mu Yiisu-Kriste, ti bwunu a bu oli waa li nde li libwe,

⁶ mu kuulu bihi lisyighi nsia a bwehe bu nde, bwehe bu aapfwaha nde bihi mu mwana a nde wu a dzyi.

⁷ Mu makili ma Yiisu, Nzaami aakwulu bihi, nde aasi masumu ma bihi kolokolo, ti bwunu a bu oli busini bu bwehe bu nde.

⁸ Nzaami aapfwaha bihi bo kunsu bunsughu bwohono ya mayele mwohono.

⁹ Nde aasuo bihi mansweghe ma waa li nde, bitsimi bi bibwe bi átswama okuru nde mu Kriste,

¹⁰ mu okuhu bye ña ookughu matala mpaala abvughu byehene kunsu litumu li Kriste, byehene bi bili mu mayulu ya bi bili ña nsie.

¹¹ Mu Kriste bihi si liibagha kaba lili pfa, bihi ba básuolo nsomo ti bwunu a bu oli bitsimi bi okuru munde wu aakagyighili mandagha mwohono ti bwunu a bu oli munkana a waa li nde,

¹² mpaala lisyighi nsia a nde, bihi ba lítswama osa emiini e bihi mu Kriste.

¹³ Mu nde, behe si bu ligyughu mandagha mama nganma, nsia yi mbwe yi a obvwughu o be, mu nde si be liisi kana ya baasi be elyimi kii Mufulu a Ngili wu básini a be.

¹⁴ Mufulu munde li kaba lili nsomo mu pfa li liibagha bihi. Bihi sa libagha lo mu matala ma baakwulu bihi kuu mukughu, mpaala bihi lisyighi nsia a nde.

Osamana o Poole

¹⁵ Me mu obo mehe-si, bu aangyughu bu bali mu okabili mu kana li be mu Mfumu Yiisu ya mu dzyi li lili a be mu baba ngili bwohonono,

¹⁶ me ndi mu okabvurulu matuono mu be matala mwohonono. Ya me aakansamana mu be.

¹⁷ Nyaã Nzaami a Mfumu a bihi Yiisu-Kriste, Taara wu a nsia, agwa be mufulu wu a bunsughu ya wu aakasuo mandagha mama ensweghe, wu aasa ti be lisoolo nde.

¹⁸ Nyaã Nzaami abaha mikolo mi be mu obaghala ya osoolo nki emiini ki bákuru mu mbili yi áti nde be, nki busini bubu nsia a pfa li nde ña kara li baba ngili,

¹⁹ ya nki bunene bu lileene nde aasuo kundaa bihi ba liikasa kana, lileene lilo li aasuo nde ya mpini yohonono.

²⁰ Nde aasuo lileene lilo bu aasiili Kriste ña kara li ba bákpi ya aabwihi nde nsini ña kwogho-a-kwogho e nde mu mayulu.

²¹ Mu obo, Kriste li ña yulu a bimfumu byehene, litumu lwohonono, lileene lwohonono, empu kyehehe ya nswe nkwumu yi bakughu otanana, ka yini a mu matala ma o, lo ya mu matala ma maagya si.

²² *Nzaami aasuhu byehene ku nsie a myili mi Kriste*, ya nde aatwulu nde mu okala mutswi ña yulu a byehene, mutswi a libwunu li Nzaami,

²³ li lili nyuru a nde, mukughu wu a munde wu aakaluhu byehene mu baara bwohonono.

2

Obvughu mu bwehe

¹ Lo be, be áli líipki mu nkooro a bibili bi be ya masumu ma be.

² Be áli líikanama bipfu bi baara ba nsie yi, be líikanama litumu li mfumu a mifulu mi mili mu engie-a-ngie. Me mufulu munde li mu okasala mu matala ma mu ba baakabihi litumu li Nzaami.

³ Bihi bwohono si líili ti anga bo ya mu nsi-nkulu líikabuludzyara bwunu a bu oli dzyi li embwuru e bihi, mu okabulugyighili mi odzyi nyuru ya bitsimi bi bihi. Mu nzya-nzyara a bihi, bihi líili baara baala nkehe a Nzaami yífaana obwa mu bihi ti anga mu babake.

⁴ Lo Nzaami alwulu mu nyíĩ, ya mu nkooro a dzyi li linene li adzyi nde bihi,

⁵ bihi baala áli líikpi mu nkooro a masumu ma bihi, nde aabvurulu bihi baba mweẽ emõ ya Kriste. Me mu bwehe bu Nzaami be liibvwughu.

⁶ Nde aasiili bihi mu lipfu ya aabwihi bihi nsini mu mayulu emõ ya Yíisu-Kriste,

⁷ mu osuo mu matala ma maagya, busini bu bwehe bu nde bu bubvulu olagha, mu bubwe bu nde kundaa bihi mu Yíisu-Kriste.

⁸ Mu kuulu, me mu bwehe baabvwuhu be, mu nzili a kana. Obvwughu oko ka ofi kundaa beme o, ko oli ekaba e Nzaami.

⁹ Ka oli mu nkooro a bigyighili o, mpaala mbwuru si mumõ anyaa okala a ligwagha.

¹⁰ Mu kuulu bihi lili baara ba ógyighili Nzaami. Nde áagyighili bihi mu Yíisu-Kriste mpaala likala a bigyighili bi bibwe, bigyighili bi átswama okuru nde, buulu bihi lisalala bye.

Ba-Dzwife ya baala ka bali ba-Dzwife o bali mbwuru mumõ mu Kriste

¹¹ Mu obo, liikalibili mweẽ mu ndagha yi: Mu nsi-nkulu be líli baala ka bali ba-Dzwife o mu musunu, bákalyele be ti ba bágwene osomo nzo a mbaa kundaa ba baakatsimi ti bo básomo nzo a mbaa, lo básomo nzo a mbaa mu manyuru ma bo ya mu myaã mi baara.

¹² Mu matala mamõ be ka líli a Kriste o, be líli banzyi mu nsie a Isaraye, banzyi mu ogwihini ku misiini, ba bagwene a emiini ya ba bagwene a Nzaami mu nsie.

¹³ Lo mu matala ma, mu Yiisu-Kriste, be baala mu nsi-nkulu líli la, be ayi be-bele mu makili ma Kriste.

¹⁴ Mu kuulu me nde li edzuunu e bihi, nde wu aasi kuulu ti Ba-dzwife ya baala ka bali Ba-dzwife o bakala ekaana emõ. Bu aagwi nyuru a nde, nde aatsala ebagha kii eekakabala bo, ya ki eekalo etaara ña kara li bo.

¹⁵ Nde aasyehe Mikyene ekulu emõ ya mikele ya litumu li mye, mpaala mu ndeme, nde agyighili mu bo bansa buolo, mbwuru mutsyini wu munyaghara, mu osa edzuunu,

¹⁶ ya mu osa ogwihini ña kara li bansa buolo ya Nzaami mu nyuru nga-mõ mu kuruwa, bu amana mbele.

¹⁷ Nde aayagwa nsia, ti anga nsia yi mbwe, edzuunu kundaa be ba líli la, ya edzuunu kundaa ba báli be-bele.

¹⁸ Buulu mu nde, bihi bansa buolo lili a muswa mu osomo ña oli Taara mu Mufulu nga-mumõ.

¹⁹ Mu obo, be ka lifirisyili banzyi o, ngu okala baara ba baafi mu mansie makimi. Lo be ayi

basi nsie emõ ya baba ngili, baara baba dzumu li Nzaami.

²⁰ Be baatwu be ña yulu a bitsini bi bibagha bi nzo bi bili bantumu ya mibighili, ya Yiisu-Kriste ndeme li limeẽ lili ña mutswunu li liikakwara nzo

²¹ Me mu nde nzo yohono yiigwama ya yitemene mu okala nzo a nzaami yi a ngili mu Mfumu.

²² Mu nde behe si bátwu be emõ mu okala nzo yi ookakala Nzaami mu Mufulu.

3

Mansweghe ma Kriste

¹ Mu ndagha oyo, me Poole ndi mbwuru a boloko mu esala e Yiisu-Kriste mu nkooro a be, baala ka lili ba-Dzwife o...

² Kala ti be lígyughu, bwunu a bu oli esala e bwehe bu Nzaami ki bágwi me mu nkooro a be.

³ Mu limono baasuo me mansweghe ma Nzaami, ti bwunu a bu aansono me be mo mapfi-mapfi mu mukaana wu.

⁴ Bu litaã mukaana wu, be likughu obaghala mayele ma ndi a me mu mansweghe ma Kriste.

⁵ Mansweghe mamu ka básuo mo kundaa baana ba baara mu biseene bibike o ti anga bu baasuo mo mu matala ma mu Mufulu kundaa bantumu ba nde baba ngili ya mibighili:

⁶ Mu osoolo ti baala ka bali ba-Dzwife o bali a pfa limõ lyini lilo, bali nyuru mō gyini oyo, bali mu misiini myini mimye, mu Yiisu-Kriste mu nsia yi mbwe.

⁷ Mu nkooro a Nsia yi Mbwe oyo me ayi musala, ti bwunu a bu oli ekaba e bwehe bu Nzaami bu baagwi kundaa me, mu nzili a bwehe bu nde.

⁸ Kundaa me, me wu mbvulu busala mu mup-funu ŋa kara li baba ngili bwohono, baagwi me bwehe bubo buu otsala kundaa baala ka bali ba-Dzwife o muyighi a busini bu Kriste, ti anga nsia yi mbwe,

⁹ ya mu osuo ŋa tse-tse kundaa baara bwohono omoŋono o mansweghe ma Nzaami, nde wu áagyighili bilogho byehene, ábunu mansweghe mamu obaana ku ebaana.

¹⁰ Mpaala mu nzili a libwunu li Nzaami, bam-fumu ya ba baakatumu mu mayulu basoolo bun-sughu bu Nzaami bubu bifa-bifa,

¹¹ ti bwunu a bu aagyighili nde, mu Mfumu a bihi Yiisu-Kriste, bitsimi bi ákuru nde mu mibvu ya mibvu.

¹² Mu Yiisu-Kriste, ya mu kana li bihi mu nde, bihi lili a emiini ki ekughu mu obehene ya Nzaami mu kana.

¹³ Mu obo me nduomo be mu onyaã otsili bukyini mu nkooro a mpara yi ndi mu okamono me mu be. Mpara oyo yili nsia a be.

Nyaã Kriste akala mu mikolo mi be

¹⁴ Me mu obo me nkunu mabuo ŋa nkulu a Taara.

¹⁵ Me nde aakagwa nkwumu kundaa nswe dzumu li lili ku yulu ya ŋa nsie.

¹⁶ Mpaala mu busini bu nsia a nde, agwa be mpini ya lileene mu Mufulu a nde, mu nkooro a ndaana a mikolo mi be.

¹⁷ Nyaã Kriste akala munsa mikolo mi be mu kana, ya be limyehe midza ya likala ba bágwama mu dzyi,

¹⁸ mpaala emō ya baba ngili bwohono be lileene obaghala bunene, bula, muyighi, mutele,

¹⁹ ya dzyi li Kriste li liluru ligyahaba lwohono. Mu obo be liilwulu mu busini bu Nzaami bwohono.

²⁰ Kunda mu munde wu kughu ogyighili ku obvulu mi liikaluomo ya mi liikatsimi bihi mu lileene li nde li liikasala mu bihi,

²¹ kunda nde nsia munsa libwunu li Nzaami ya mu Yiisu-Kriste, mu biseene byehene, mu mibvu ya mibvu. *Aamene!*

4

Otwu nyuru a Kriste mu bumō ya mu dzyi

¹ Mu obo, me ngwi be mpama, me wu ndi mu boloko mu kuulu me aakansalala Mfumu, mu okala a nzya-nzyara yi faana ya mbili yi líkihi be,

² kunda okughulu kwohono ya mu edzuunu, ya okakuru mukolo mu okebe. Mu dzyi, liikakuru mukolo mu nzya-nzyara a babake be a be,

³ bu lisi makpa mu okakebe bumō bu ookagwa Mufulu mu munama wu edzuunu.

⁴ Oli a nyuru yini a mō ya Mufulu yini a mumō, bumō si Nzaami áti be mbili mu emiini yini a emō.

⁵ Oli a Mfumu yini a mumō, kana yini a limō, liboghoru yini a limō,

⁶ Nzaami yini a mumō ya Taara a bwohono, wu aakatumu bwohono, wu aakasala mu bwohono, ya wu li mu bwohono.

⁷ Lo kundaa nswe mbwuru mu bihi, baagwi bwehe, ti bwunu a bu oli eteese ki ekaba e Kriste.

⁸ Me mu obo bályele ti:

*Na ákumu nde ku yulu,
nde ábiri baara ba boloko,
nde ágwi baara bikaba.*

⁹ *Nde ákumu!* Bunu odzyi olyele, nsomo nde akumu, nde átswama okumunu ku nsini a nsie?

¹⁰ Munde wu aakumunu, me wuunu munde si aakumu ku nkara a mayulu mwohono, mpaala aluhu bilogho byehene.

¹¹ Ya nde aasi kuulu ti, bana bakala bantumu, babamõ mibighili, babake ba baakatsala nsia yi mbwe, ya babake minkaala bibuolo ya baluo.

¹² Nde aasi obo mu kuulu baba ngili bakala ba bakughu mu osala esala kii otwu nyuru a Kriste,

¹³ tee mu matala ma liito bihi bwohono mu bumõ bu kana ya ligyahaba li Mwana a Nzaami, ya bihi sa likala kara a mukughu ti anga Kriste wu li mukughu.

¹⁴ Mu obo, bihi ka lifirikala bike-bike o, ba ookanyihi mampo ma madza ya ba ookabiri bifulu bibi maluo. Bihi ka lifirikihi o ti bakanene ya ba bakadzihibi bihi mu mpya ya mayele baara ma mabi.

¹⁵ Lo bu liikalyele nganma munsa dzyi, bihi li-faana okulu mu mandagha mwohono mu Kriste, nde wu li mutswi.

¹⁶ Me mu nde, binama bi nyuru byehe bib-vununu ebini emõ mu libaha li misunu ya mikaã. Mu obo, ña okasala nswe enama bwunu a bu ofaana, nyuru yohono yiikakulu mu dzyi.

Mbwuru wu mukulu ya mbwuru wu mun-yaghara

¹⁷ Mu obo, ndagha yi ndyele me ya yinsuo me be bumpughulu mu Mfumu me yi: Ka lifirikala a nzya-nzyara a baara ba bagwene osoolo Nzaami o, baala bitsimi bi bo yini a mu mandagha ma magwene a mupfunu.

¹⁸ Mayele ma bo mali kunsu mpyibi, ya bo bali banzyi mu bumweẽ bu Nzaami, mu nkooro a nzi-nzimini yi li mu bo ya mu nkooro a mikolo ngyi mi bo.

¹⁹ Bo ka baafirikamono bupfiri o, bo áyi batyeghe manyuru ma bo mu mandagha mama enkwunu, bo baakagyighili mandagha mama osunumu mama mawa-mawa.

²⁰ Lo be, ka obo be liisoolo Kriste o,

²¹ kala ti me nde be liigyughu ya baaluo be, ti bwunu a bu oli enganma ki eli mu Yiisu.

²² Lo be lifaana odzwulu embwuru e be ki ekulu ki efaana ya nzya-nzyara a be yi nkulu, ya ki eekabyihi kyeme mu manzala ma kye mama mpya.

²³ Be lifaana okighiri mu mufulu mu mayele ma be

²⁴ ya olaha embwuru ki enyaghara, ki baagyighili mu efa kii Nzaami, munsu bunsumu ya bungili bu buukaburu enganma.

²⁵ Mu obo, linyaã mpya ya nswe mbwuru mu be akalyele enganma kundaa nganda a nde, mu kuulu bihi-a-be lili binama bibi nyuru mō.

²⁶ Mu matala ma liikabagha be nkehe, ka likasa masumu o. Tala linyaã odzyama ŋaala be lili nkini ya nkehe.

²⁷ Ka likagwa mpeene kundaa dyabulu o.

²⁸ Muturu anyaa ofirikaturu. Lo nde akasa mpini mu osala mu myaa mi nde esala ki ebwe, mpaala nde abagha ki aagwa kundaa wu aakeghele.

²⁹ Ndagha si mō yi mbi yinyaã opala mu minjma mi be. Lo kala ti yo yipala, lo yikala yimbwe, yi aatwu, ya yi aagwa bwehe kundaa ba baagyughu yo.

³⁰ Ka likagwa Mufulu a Ngili a Nzaami nyiĩ o, mu kuulu mu nde bási be elyimi mu etsughu ki akala ookwulu be Nzaami.

³¹ Limaha ŋa kara be nkala, kakaba, nkehe, kyele, bitughu, ya mandagha mwohonono ma mabi.

³² Liikakala baara ba babwe ya banga a mikolo nyiĩ be a be, liikasa be a be kolokolo, ti bwunu a bu ósi be Nzaami kolokolo mu Kriste.

5

¹ Be lifaana okanama bwunu a bu oli Nzaami, ti anga baana baba mukolo,

² ya liikakala mu dzyi ti bwunu a bu ódzyi bihi-a-be Kriste. Nde ágwi nyuru a nde kundaa Nzaami ti anga ekaba ya mukaba wu otsughu mu nkooro a bihi-a-be, ti anga mananaase mama mpihi yi mbwe.

³ Ti anga bu ofaana kundaa baba ngili, banyaã ofirikatanjana ŋa kara li be enkwunu, mandagha mama osunumu mama mawa-mawa, ntono a nzi.

⁴ Mbiili yi budzwa, mbiili yi buwulu bwunu we yi mbi ka yifaana ŋa kara li be o. Lo be lifaana okabvurulu matuono.

⁵ Mu kuulu, ligyighili osoolo ti: Mbwururu si mumõ mu banga-a-enkwunu, baba sunumu, banga a ntono a nzi (ekye me efaana kii osamana ba nzaami baba mpya), ka babagha pfa mu Emfumu e Kriste ya kii Nzaami o.

Mu nsi-nkulu mpyibi yi a laña-laña, mu matala ma ayi otsyeme

⁶ Mbwururu anyaa opfiri be mu mbiili yi mukajana. Mu kuulu mu nkooro yo nkehe a Nzaami yiigya ña yulu a ba baakateme a Nde ngangala.

⁷ Ka likala a mfwunu mõ ya bo o.

⁸ Mu kuulu, mu nsi-nkulu be líli mpyibi yi a laña-laña, lo mu matala ma be lili otsyeme mu Mfumu. Liikakala ti anga baana baba otsyeme.

⁹ Mu kuulu, mimburu mi otsyeme me bubwe, bunsumu, enganma.

¹⁰ Ligyahaba likeene mandagha ma maakagwa Mfumu esee,

¹¹ ya ka likakala bumõ mu bigyighili bi bigwene a mupfunu bibi mpyibi o. Lo liikafwunu bye.

¹² Mu kuulu, mandagha ma ookagyighili baara babo mu ensweghe mali mama budzwa mu obili mu mo.

¹³ Lo bu bafwunu mandagha mamu, mo mamonono ña otsyeme bu mali mo.

¹⁴ Mu kuulu mandagha mwohonu maala ayi ma maamonono mo mali otsyeme. Mu obo baakalyele ti:

Sighili, we wuli ensama,
temene ña kara li ba bápki,
ya Kriste sa atwulu we kunsu otsyeme.

¹⁵ Liikasa mayele mu nzya-nzyara a be: Ka likakala ti anga biwulu o, lo liikakala ti anga banga-a-munzeele,

¹⁶ Lisalala matala mukuulu bitsughu bili bibi.

¹⁷ Mu obo, ka likala baara ba bagwene a mayele o, lo libaghala waa li Mfumu bunu lili.

¹⁸ Ka likakolo bviini o, mo maakabiri ku odzi-mini, lo likala ba bálwulu mu Mufulu.

¹⁹ Liikagwa be a be mpama mu bikwumu, bikwumu bibi nsia ya bikwumu bi ógwi Mufulu, likagyimi ya likagwa Mfumu nsia mu mukolo a be ndehene.

²⁰ Mu matala mwohonono, mu mandagha mwohonono, likabvuhulu matuono kundaa munde wu li Nzaami Taara mu nkwumu a Mfumu a bihi Yiisu-Kriste.

Balumu ya bakala

²¹ Be ba likagwa Kriste budziri, likakihi litumu li babamõ be a be.

²² Bakaha, liikakihi litumu li balumu ba be ti anga bu liikakihi be litumu li Mfumu.

²³ Mu kuulu baghala li mfumu a mukaha, ti anga bu oli Kriste mfumu a Libwunu, li lili nyuru a nde, yi ali nde mubvwuhu.

²⁴ Lo, bwunu a bu ookakihi Libwunu litumu li Kriste, nyaã bakaha si bakakihi litumu li balumu ba bo mu mandagha mwohonono.

²⁵ Balumu, liikadzyi bakala ba be ti anga bu ódzyi Kriste Libwunu ya nde ndeme ágwi nyuru a nde mu nkooro a lo.

²⁶ Obo nde ádzyi osa lo lili ngili bu atsehebe lo mu madza ma maakaswagha ya mu Ndagha,

²⁷ mpaala nde asuo ŋa nkulu a ndeme libwunu li libwe, li ligwene a mpiri, ngu okala mikara, ngu okala elogho ki ebi, lo likala libwunu li lingili ya li ligwene a epfwumu.

²⁸ Bwunu obo si balumu bafaana odzyi bakala ba bo, ti anga manyuru a bomo. Munde wu aakadzyi mukala a nde, nde dzyi nyuru a ndeme.

²⁹ Mbwuru nkini ka ámaabele nyuru a ndeme o, lo nde aakabununu yo ya aakasa yo bunkere ti anga bu ookasa Kriste mu libwunu,

³⁰ mu kuulu bihi-a-be lili binama bi nyuru a nde.

³¹ *Me mu obo baghala sa asihi taara ya ngughu a nde, sa anabara ya mukala a nde, ya bansa buolo sa bakala nyuru mō **.

³² Mamo mali mansweghe ma manene. Me, me ndyele ti mo matala Kriste ya Libwunu li Nzaami.

³³ Ngu mu obo, nyaã mumõ-mumõ mu be adzyi mukala a nde ti anga ndeme, ya mukala agwa mulumu a nde budziri.

6

Baana ya biburu

¹ Baana, liikakihi litumu li biburu bi be, mu kuulu, obo oli bunsumu mu Mfumu.

² *Gwa taara ya ngughu a we budziri*, munde me mukyene wu a nsomo wu li ya misiini:

³ *mpaala we kala a esee ya we laama ŋa nsie .*

⁴ Be bataara, ka likagwa baana ba be nkehe o, lo liikakwuhu bo kunsu maluo ya mu bigyehe bi Mfumu.

* **5:31 5.31** Eba 2.24.

Bankana ya bamfumu

⁵ Bankana, liikasa bintamana kundaa bamfumu ba be baba ŋa nsie kunsu nzalamweē ya oteghere, mu mukolo wu bunya-nyaā, ti anga be ba lili mu okasa bintamana kundaa Kriste.

⁶ Ka likasa obo yini a ŋa mihi mi bo o, ti anga mu omonono bubwe kundaa baara, lo likakihi litumu ti anga bankana ba Kriste ba baakagyighili waa li Nzaami mu mukolo mumō.

⁷ Liikasalala bo mu mukolo mumō ti anga be lili mu okasalala Mfumu, lo ka ti anga ba bali mu okasalala baara o,

⁸ bu lisoolo ti, nswe mbwuru, ngu ali nkana bwunu we mbwuru wu bunya-nyaā, ndeme sa abagha mufuru kundaa Mfumu mu mandagha ma mabwe ma aakagyighili nde.

⁹ Kundaa be bamfumu, liikasa bwunu obo si kundaa bankana ba be. Linyaā miŋaana, bu lisoolo Mfumu a bo ya wu a ndaa be li mu mayulu, ya nde ka li a munsuolo a bidzili o.

Bidzwana bi ookagwa Nzaami

¹⁰ Mu omana, libagha mpini mu Mfumu, mu litumu li lileene li nde lwohono.

¹¹ Lilaha bidzwana bi Nzaami byehene mpaala be lileene otemene ŋa nkulu a bigyighili bi dyabulu bibi emfiri-a-mpya.

¹² Mu kuulu, ekyini ki lili a kye, ka eli kii odzwana mu musunu ya makili o, lo kii odzwana a bimpu, bamfumu ya lileene bi nsie yi a mpyibi yi a laŋa-laŋa yi, ekyini kii odzwana a lileene li mifulu mi mibi mi mili ku yulu, ŋa kara li mayulu ya nsie.

¹³ Mu obo, ligwolo bidzwana bi Nzaami byehene, mpaala be likala a mpini mu etsughu ki ebi ya bu limana ogyighili mandagha mwohonono, be litemene bubwe.

¹⁴ Mu obo, ligyighili otemene! Lilaha enganma ti anga muswele mu bala, ya lilaha bunsumu ti anga enkuru kii mu bisyeē ki eekakyi butulu.

¹⁵ Lilaha ti anga bikoghoru mu myili mi be mana maa otsala Nsia yi Mbwe yi edzuunu.

¹⁶ Mu matala mwohonono, ligwolo kana ti anga likubu, mu lo be lileene odzihibi magyo ma mbaa mama Wu Mubi.

¹⁷ Ligwolo si obvwughu ti anga mpu yi esyeē ya Ndagha a Nzaami ti anga lipee lili Mufulu.

¹⁸ Mu libaha li Mufulu, liikasamana mu Mufulu mu nswe matala mu nsa-nsamana yi mawamawa ya yi a opele. Mu obo likahala mihi ya mu nswe matala lisa mukama mu okapele Nzaami mu nkooro a baba ngili bwohonono.

¹⁹ Liikasamana mu nkooro a mehe si, mpaala Nzaami agwa me ndagha yi olyele mu matala ma akala aandzubulu me munma mu otsala mu kana nsia a mansweghe ma Nsia yi Mbwe.

²⁰ Mu nkooro a ndagha oyo me ndi embala kii Nsia yi Mbwe, wu bákuru misyi mimi bisyeē. Mu obo liikasamana mpaala me kambili ya kana mu Nsia yi Mbwe bwunu a bu mfaana me obili mu yo.

Mamboro mama masini

²¹ Tisyike sa agwa be mansia mwohonono, mpaala behe si lisoolo mandagha ma matala me ya ma ndi mu okagyighili me. Nde li ndughu mu

kana wu mukolo, musala a Mfumu wu bakughu
osa kana mu nde.

²² Me ngweghe be nde mu mpere mpaala be
lisoolo mandagha ma matala bihi, ya mpaala nde
agwa be bukyini.

²³ Nyaã edzuunu, dzyi ya kana bi bifi kundaa
Nzaami Taara, ya kundaa Mfumu a bihi Yiisu-
Kriste bikala ya bandughu mu kana!

²⁴ Nyaã bwehe bukala ya babo bwohono ba
baakadzyi Mfumu a bihi Yiisu-Kriste mu dzyi li
liigwene okabyi!

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d